

## Ebereecuru rai Ietoai

*Rai Calaohi aina cuaainte cachaauru rai erelu  
Cana Coaunera.*

<sup>1</sup> Inoaclu jetaote nere bera inoaasihuru-*profetacuru* aina cuaain araaiaain cana inoaensihuru rai ere Cana Coaunera, ecoetacaaeneein mituhelanaala, taba que acaauru sinihu, taba que letonocuru anjeraauru letoae, acaauru rai ecocohin beeuruhane coina, naaonjoaain. <sup>2</sup> Nete laen inae enene Calaohi que nere berate Cana Coaunera, Cana Coaunera nihane coitucuhacache itolereneeinne coina. Nii rai Calaohi aina cuaainte, itolere cana rai chauratane, dede, itolere cautenu rijihuru, itolere cana janonaa, naaonjoainuri coaunaain niichuru Curuaanaa neein telu Cana Coaunera.

<sup>3</sup> Nihei chunei cacha niqui Cana Coaunera coaraai. Nete caje uhin canaacaanu rene ecooca rai Calaohine jaun, canaacaanu rohan turuaain coaracaanune jaun, “Naaonjoaan Cana Coaunera,” naain coitucuhacaanu, jeelai Cana Coaunera tocohaneein necaohachaaain nichao que ichaohana jaun. Acate Cana Coaunera Calaohineein itolere sirichaneein coaraneein ne. Acate Cana Coaunera Calaohineein caa chauratane que ohelu, jianacoon osa caje cana mitaeranu que. Nitohaneeinte inae osa caje cana mitaeranu que ohane baiha, rai Inaca Cana Coaunera raotono nichajai que rori-*trono* ichoae nelauriaa cuclu.

*Anjeraauru amurijiriinte cocoinanojineein ne Cana Coaunera Calaohi.*

<sup>4</sup> Jataain rai letonocuru anjeraauru cocoinaane amurijiriinte, rai Calaohi cocoinaelu Cana Coaunera, acaauru amurijiriin nihane coina. <sup>5</sup> Nitohanihane jaun, nihei chuni letono anjera rai:

“Iite cacalabineein  
canuhacha jereineein  
canuhacha teineein  
nenaaneeicha,”

naain irihei Cana Coaunera. Niheichu chuni letono anjera que:

“Leinjiin acaacha  
canu calaohineein nihane janana,  
Canu, leinjiin  
inaca neein nereeunicha,”

naain irihei Cana Coaunera. <sup>6</sup> Caa chauratane que nenacaauru cachaaauru que, leinjiin acaacha rai calaohineein nihane coitucueratihane cointate laen:

“Quere tonoraain  
canu coroaeequichene rijijieein,  
jerichanejeein nere tonoraain  
coroaecuche satiin,”

nae, rai letonocuru anjeraauru rai, Cana Coaunera. <sup>7</sup> Nii rai letonocuru anjeraauru quete laen:

“Canu letonocuru- anjeraaurute laen aiha cujuanaane rijijieein, usi rijijieein naaonjoain canuhacha jerei icharaneein neeurureein,” nae Cana Coaunera.

<sup>8</sup> Jana rai Calaohi quete laen:  
“Chabana sarinaain

itolere Curuaanaa neein-  
itolere Coaunera neein neeine.

Chaen techu

chabana satonoenereein

caohacha ichaain neeine.

<sup>9</sup> Nii rijijieein techu

caohacha nejesina ichara

curuaanaa neein neina jaun,

esinae rauhijiriin

baaso ichaain nenacaauru aina nejerateein,

caohacha icharaauru belairiquiin.

Nii coinane

Canu, Itolere Coaunera neein

ii Coauneranichaaunne

ii teein neein,

ii, jataain

leechoaauru amuritoheriin

raotojoein rachoojoein

neeine coina,”

nae Cana Coaunera.

<sup>10</sup> Chaen techu:

“Ii canuhacha tei

Curuaanaa neeinete,

jauriaanejeein

nunuhe caje coauneein niha

cana rai chauratanene coina

aitiin dede coaunaailu.

<sup>11</sup> Satiin iicha coaunanojoite sareein.

Jana iite laen chabana nitajenereein.

<sup>12</sup> Inae ecu tihane banate,

siriteein saa cajionene jaohin,

enachasine que coreein jianaa rijijieein,

janonaa coreriquiin.

Nete laen,

ii chabana satonoelanaala

ichaoriquiin,”

naelu rai Calaohi rai Cana Coaunera.

<sup>13</sup> Nii jaun coatiha chuni, rai letono anjera rai:

“Chajaaute

caraaotono nichajai que nelaauriaena,

ii tijia asaae

iniha nejeratenacaauru

amuritiin tee te coaraaicha,”

naailu Cana Coaunera. Chabana nii Calaohi que aitothane rijijieein letono anjeraauru que iriheĩ.

<sup>14</sup> Nechu raujiaain ichoteratenojieein nerichaacheeinne rai, cha beraneeichate suujueenein Cana Coaunera tenojieein neeure rai anjeraauru.

## 2

*Cana ichoterateraneein nenea que jaoleconaa nainihaacache.*

<sup>1</sup> Nitohanihana jaun, nere beracuru que Cana Coauneraacha beratei aonaain tonoraain-esenetaain nihacachenete caohachae. Jana nii cana rai niicha beratenojoin aonaain caohatiin coitucunaa saijieein tonoraenihacachenete, aihuruha coitucuelanaala nenacaaurune rijijieein nitajerichaacheein. <sup>2</sup> Coaracuche

nachuhinti, nii rai letonocuru- anjeraauru que niicha teratei niha nii rai jauriaanejeein nenea- rauhine saijieein tonoraelanaala naosatenacaauru cachaauru- esinae rauhijiriin baaso ichacuruhane coreniha caseteco coaracuruhalune. <sup>3</sup> Nitohanihane jaun,

caseteco caje nichotenaa nainerihacacheein, nii jauriaanejeein nenea amuritoheriin, cana ichoteraneein nenea esenetaenihacachene. Esenetaain nihacachene coinate, jauriaanejeein

raaje nihane cana rai beein nelu Cana Curuaanaa Jesocurisito. Nii baihate cana rai beeurelu aina amuhemujueein nota que coaraauru. <sup>4</sup> Nii ichoae tacaain techu, cana que coitucuerate Cana Coaunera itolere cojoelanaacojoaihuru ichaain. Chaaen techu Aca jerihane rijijieein, le cacha nichaachene rai niicha tei- Suujue aina cuaain cana que coitucuerate.

*Cana nejera rijijieein niha Jesocurisitone*

<sup>5</sup> Coatiha rai letonocuru anjeraauru, nii cabaiha neenihu rai Cojoanona caa ereereecaachene jaan coaraneein neeuruhane coina aito hi Cana Coaunera. <sup>6</sup> Nitohanenihane quete:

“Chanein ne cacha.

Chatohanaineeina nenaane cacha.

Chanuna acaacha coacuhin,

jataaen queecha coauqui.

<sup>7</sup> Jauriaanejeeinte niqui

ii letonocuru- anjeraauru

cocoinaaine fautaain cocoinaailu.

Nete nii baiha laen,

jataain leeochoauru amurijiriin cocoinaain,  
que itolere Curuaanaa nihane comai lauriaain,

<sup>8</sup> satiin nere tonoraain

neeuruhane coina ichaain,

tijia asaae que nejeratenacaauru

teeilu,”

naain ne laenanohineein Cana Coaunera Quiricha cuhane. Nitohanein satiin nere

tonoraain nihacachane coina, cocoinaain

rai tijia asaae que nejeratenacaauru tihane

coina, aito hane saijieein jaiti nitohanein ichaa

Cana Coaunerane coarahaacache. <sup>9</sup> Nete laen,

inae anjeraauru fautaain nelatihei rijijieein turuhin nihalu carajaojoaain Jesocurisitone coaracaache. Nitohaneein turuhinte, rai chaneein nenihacachene saijieein, jataain cana belaitohane jaun, cana coreniha ohane coina ichaelu Cana Coaunera. Nii cana coreniha cairichanojineein ohalune corenihate, itolere curuaanaacuru Curuaanaa neein nihane cojunacaneein necaohachaa Cana Coaunerane que comaitenojineein ne.

<sup>10</sup> Satiin itolerete Cana Coaunera raineein ne, niicha coaunanojineein niha itolerene jaun. Nii jaunte niicha coaunanojineein rai calaohi neein nihacachene jaun, rai Cojoanonaa caa baiha neeni que nihacachene jere Cana Coaunera. Nii jaunte cana coreniha necairichaa Jesocurisitone aina cuaain, nii aansijiiniji osa colane telu, satiin niicha coaunanojoinunru ichoteraneein nihane coina. <sup>11</sup> Nitohanihane jaunte, ita Inaca que Inacaain nihacache, nii cana osa caje cana ichoteratera aina jiniiquiin. Nii jaunte, rai nejera neein inae nihacachene jaun coejelanaala: “Canejeraauru,” nae cana rai Cana Coaunera Calaohi.

<sup>12</sup> Niritorichaaaine quete:

“Canejeraauru raine

Iineein neeine beebejeein,

netaojiaain

Ii coroaeraauru cataaun

nenatereeeunni,”

naalune, laenananojineein nelu Cana Coaunera Quiricha cuhane.

<sup>13</sup> Chaen techu:

“Leinjiin Acaachane

niicha ichai ichaane coina

cohajereeeunni,”

naain.

“Cauna neeun,

canu rai Cana Coaunera

tenojoihunru- cacalabihuru

ainara,”

naain ne laenanohineein.

<sup>14</sup> Charijieein teeinti, ita araainein niha cachane, ita iniho que inihoquiin, ita coichana que coichanaain, naaonjoaen cacha, nii rijijieeinte cacha iniho que inihoquiin cacha coichana que coichanaain naaonjoaelu Jesocurisito, caa chauratane que ohin, nii cacha itajeraneein nenea moconajaera amuritohane coina. <sup>15</sup> Nitohaneein moconajaera amuritiinte, ohin nitajeeururichaaine que satiin casiiriin ichaonacaauru- cachaauru ichoteratelu. <sup>16</sup> Aihane jaun, coatiha anjeraauru coroatajanihane coina turuhin niheilulu, Abaraaun nefoerateneein nenacaauru coroatajanihane coinatate turuhin nelu. <sup>17</sup> Nitohanianihane coinatate, jerichanejeein cana nejeraneein, nihacachene rijijieein tenojoineein nelu, Cana Coaunera notaracaae coujurihu cana rai saseredotecuru curuaanaacuru Curuaanaaneein, cairichaaajoaain cana coaraain, cana coreniha cairichei coaraain ohane, satiin cachaauru osa que suujua acatena nainiha Cana Coaunerane coina. <sup>18</sup> Nitohaneein raajenihane necairichanaa coaraain, cojunojoinneein nihalune jaunte, rijijieein necairichanaa coaraain, cojunojoinneein niha cachane coaraane, coroatajaneein naaonjoaen.

### 3

#### *Moisesa amurijiriin cocoainanohi niha Jesusone*

<sup>1</sup> Canejeraauru, aihane jaun Cana Coaunera ranojoneein, inae rai cachaneein neeichene jaun, niicha icharatenohi icharaanu que niicha tei- Jesocurisitohacha que coaucuche. Nariha jataain coreniha chabana satonoelanaala esenetaacachene jaun. <sup>2</sup> Jerihane rijijieein nere tonoraain niha Jesocurisitone jaunte, niicha icharatei icharaanu que cocoaain nelu Cana Coaunera. Nii rijijieein techu, Cana Coaunera cachaneein nenacaauru aina, niicha icharatenohi icharaneein nelu Moisesa. <sup>3</sup> Charijieein teinti, niicha jai loreri amurijiriin jataain nelateineein ne loreri ichara, nii rijijieeinte, jataain Moisesa amurijiriin nelateineein nelu Jesocurisito. <sup>4</sup> Itolere lorerite, niha icharane jaun neein naaonjoaen. Nete laen Cana Coaunera coaunaane jaun, neein naaonjoaen itolere. <sup>5</sup> Nii rijijieein techu, rai cachaneein nenacaauru rai Cana Coauneraacha icharatei icharaneein nihane jaun, raujiaain nota que coaraain, que niicha beratei beraneein nelu Moisesa. <sup>6</sup> Nete laen rai Calaohi Jesocurisito, cana rai cachaneein- rai loreri rijijieein nihacachene amurijiriin, cocoaain cana inana neein telu. Nii jaunte, rai loreri rijijieein nerichaacheein, esinae rauhijiriin jerihane rijijieein neein, chabana cohajihacachene coiinteein janelanaala canaacha cohajei cohajihacachene.



*Acaauru que Cana Coauneraacha banihatihu  
turuuenerichaaain rai cachaauru tabaaurune*

<sup>7</sup> Nitohanihane jaun, rai Quiricha Inoaensi  
cuhane:

“Enene cojoanonaa  
cuhane inara rai niicha jerei  
biha Cana Coaunerane,

<sup>8</sup> jiaonriha  
inara suujua aohana jerelanaala,  
aihuruhalu nere tonoraelanaala,  
nechu acaauru casetecaa  
Cana Coaunerane cojuhin coaraa  
cacha areroo ichatane janane  
rijijieein nihache.

<sup>9</sup> Ecute  
jenachoonca jaanacaneein  
mainajeriin acaauru notajaain,  
acaauru coroatajanichaaunne saijieein,  
acaauru casetacaanune coujuha  
quere tonoraarenelu- inara foerateracuru.

<sup>10</sup> Nii jaunna,  
nii inara foerateracuru aina obajeein:  
‘Nechu itolere bana  
joenreein rai suujua cuaauruhane jaunte,  
acaauru que  
canuhacha coitucueratena  
jerei coitucunaa jerecurene.’

naain:

<sup>11</sup> Aihane jaun,  
coatiha acaauru que banihateein  
canuhacha rucujueihu  
turuururinaain,”  
naain biha Cana Coaunera Suujuene jaun ne lae-  
nanohineein.

<sup>12</sup> Aihane jaun canejeraauru, le cacha nequichene- inara netonai nabana cana rai Cana Coaunera beratei esenetaain neeichene jianequichene coataa, que nainaaïn necoholajiin ichaaoche. <sup>13</sup> Nitohaneein nenea coacuelanaala, jianeein lecacha nequichene jiniiquiin ita suujua lararajiaain neeuche: “Enene cojoanonaa,” naain aitoa Cana Coaunera Quiricha cuhanena jaan que turusahane ajiniha. Nabana inara tabaauru saruhin niha osane, rijitojoein chatohanai ichaquichene, inara netonai canaacha esenetai esenetaelanaala naitoonjoan tonoraeneeichene coataa. <sup>14</sup> Nitohanihane jaun, esinae rauhijiriin Jesocurisito aina nenea jerichaachene, nii esenetaacachene bana canaacha cohajei que turuhane reeintiaain esenetaacachenete ne.

<sup>15</sup> Nii cinate:

“Enene cojoanonaa cuhane  
inara rai niicha jerei biha  
Cana Coaunerane,  
jiaonriha  
inara suujua aohana jerelanaala,  
aihuruhalu  
nere tonoraelanaala  
nenacaaurulune rijijieein nihache.”  
nae Nere Inoaesi.

<sup>16</sup> “Charijihuru Cana Coaunera ere aonacuruhane saijieein nii baiha nere tonorana jerecurenelu,” naaichena. Acaaurute, satiin Egipto batane caje Moisesaacha rocoorinelu. <sup>17</sup> Nii jeelaihuru que techu, nitohaneein nere tonoracurenihane jaun, acaauru que nejerateein acaauru coroatajanihane jianiha jenachoonca jaanacaneein Cana Coaunerane jaun, ichataneu cacha

areroo satiin ohacoaurelu. <sup>18</sup> Chaen techu nii jelaihuru, rai nitohaneein nere tonoracurenihane jaun, esinae rauhijiriin acaauru que banihateein niicha rucujihu enoorenerichaaaine que aitelu Cana Coaunera. <sup>19</sup> Nii jaunte, esenetacurenihane coreniha nii acaauru que banihateein niicha rucujihu turuurenerichaaaine coitucuhacache raotojoein.

## 4

<sup>1</sup> Aihane jaun, jaiti cana rai niicha teeni, rai nebetacanaa cojoanonaa tihane rai niha Cana Coaunerane jaun, ecu turunaa nainichaachene coina, jataain necohalajiin ichaohacachenete caohachae. Nabana inara tabaauru, ecu turunaa nainecurenihane coataa.

<sup>2</sup> Nitohaneein cana netonai ecu turunaa nainichaachene coinata, nii Moisesa que beratihalu acaauru raine rijijieein, cana rai netonai beratelu.

Nete laen inacojoein acaauru rai beratelu, aonacuruhane saijieein, aihuruha nii niicha beratei esenetaain tonoraeraaurune rijijieein, acaauru netonai esenetaaurenihane jaun.

<sup>3</sup> Nete laen cana, esenetaera neein nihacachene jaun, nii Cana Coaunera aitoonjoan- nebetacana jaun enorichaacheein. Nitohaneein nere tonoraaururichaaaine jaun, aitorichaaaine quete:

“Nii jaunna obajeein,  
 esinae rauhijiriin  
 nebetacaanune jaun  
 turuurenerichaaaine que aitoon”

naain belu Cana Coaunera. Nete cana rai chau-ratane coaunaane nainaalune caje coauneein nelu, nii nebetacanajaa cojoanonaa naitoonjoa.

<sup>4</sup> Nii jaunte rai Quiricha Inoaensi cuhane:

“Caainsi janone cuhane jetaote,  
itolere coaunaane nainain- bana  
nebetacaelu Cana Coaunera,”  
naain laenanohineein ne.

<sup>5</sup> Nii baihate coaiten rai Quiricha cuhane, nii Israelitacuru que:

“Coatiha canu nebetacana jaaun turuururi-naain,”  
naalu Cana Coaunerane, ne laenanohineein.

<sup>6</sup> Nete, nere tonoraain ichoteratenojineein neeururichaaine aonacuruha ichoaichaniha natiin, esenetacurenihane jaun, nii nebetacana jaan Cana Coaunera aitoonjoaun turuureniha Israelitacurune coina aitohalune saijieein, jaiti neure satononiha nii naitoonjoan esenetaeraauru, acaauru coreenraniha nii nebetacana jaaun turuheninuunru.

<sup>7</sup> Nii jaunte, nii nacoauneein le janonaa que cojoinacate Cana Coaunera:

“Enene cojoanonaa,”  
naain. Nii Quiricha Inoaensi caje coitucuhichene rijijieeinte, que beratihana Cana Coaunerane jaun:  
“Enene cojoanonaa cuhane  
niicha jerei beratihana  
Cana Coaunerane,  
jiaonriha tonoraeneeichene,”  
naain belu Rabiri.

<sup>8</sup> Nii aina cunacaaurulu- Israelitacuru turuaalu Josoene jaan jelai que, aitohalu Cana Coaunerane jana nihane, coatiha leecha janonaa

berihehi Cana Coaunera, rai nebetacana jaun nihacachene que aitiin. <sup>9</sup> Nitohanihane jaunte, satiin Cana Coaunera cachaneein nenacaauru rai, ne jelai teein acaauru que banijiaain nebetacaauruna jaanu. <sup>10</sup> Charijjeein teeinti itolere coaunaane nainain nebetacaelu Cana Coaunera, nii rijijjeein techu, rai namihaneeo caje nebetacaa aicheein, nii Cana Coaunera nebetacanajau turuhin nei. <sup>11</sup> Aihane jaun, nii nere tonoraelanaala nenacaauru rijijjeein nenea coataa, atiin caaintati ichacaachene coina cana letoaane nihanatiin nere tonoraacachenete ne, nii rai nebetacanajau turunaa nainichaachene coina.

<sup>12</sup> Nii cana rai Cana Coaunera beratenojoi Er-enaate, cana ichao coreein, cana rai leecha ichaonaa teraneein, naajoainein nenea ne. Acate aiha soondarooru rai sabere- jerane ajinaain nenaane amurijiriin nihane jaun, cana suujua cuhane enohin cana suujuene maajeein coitucue. Nii jaunte cana suujua cuhane canaacha coacui, canaacha ichana jerei, naaonjoainuri baasoneein, caohachaneein, naaonjoaane coitucue raotojoein. <sup>13</sup> Nitohanihane jaun, nihei chuni Cana Coaunera coaunanojoneein nenea, que nasiha nainera. Acate inae ecu tihane bana rai canaacha beenei coitucue.

### *Saseredotecuru curuaanaa Curuaanaa Jesoso*

<sup>14</sup> Cana Coaunera Calaohi Jesusote, acaihaniji cana rai saseredotecuru curuaanaacuru Curuaanaa neein dedeeu cuelu. Aihane jaun, leinjiin acaacha esenetaain cohajihacachene rijijjeein, itolere bana jianena coacuelanaala

beebejeein, acaacha cohajihacachenete caohachae. <sup>15</sup> Acate cana rai saseredotecuru curuaanaacuru Curuaanaa nihane jaun, coujunojoinichaachene enaacha osa que nesaruna nainichaachene coitucue; acaentonai aihacachene rijijieein coujunojoineein nerejetohalune jaun. Nete laen, nii saiijieein chabana osa que nesaruenelu. <sup>16</sup> Aihane jaun, chaque tonajelanaala, atiin cana belaicha Cana Coaunera rori- *trono* rohan netichaachenete ne; cairichaojoaain cana coaraain, latichaachene naineein cana rai caohacha ichaain cana coroatajanena nainihane coina.

## 5

<sup>1</sup> Satiin saseredotecuru curuaanaacuru curuaanaate, cachaauru jana janijiin, Cana Coauneraaacha teineein ne, aca cachaauru osa coreniha, Cana Coaunera rai itolere teein, inihocuru mocoeranu *sacrificios* que nihane coina. <sup>2</sup> Nii jaunte acaentonai joaenreein cacha rijijieein nihane jaun, cairichaojoaain-cha coitucuelanaala nenacaauru, nitajerai nenacaauru, naaonjoainuri coarae. <sup>3</sup> Nitohaneein joaenreein cacha rijijieein nihane jaunte, rai nosa, cachaauru osa, naaonjoain coreniha, Cana Coaunera rai itolere lenonecuru *sacrificios* sohin mocoee. <sup>4</sup> Nihei chuni raajenihane jerihane rijijieein, saseredote neein cocoainanohineein nei. Aaroon janijiin raain cocoainaalune rijijieein, raain cocoainaa Cana Coaunerane banaachate laen saseredote neein nena naine cacha. <sup>5</sup> Nii rijijieein chu coatiha raajenihane saseredote neein nihane coina, co-

coainanohineein niheilu Jesoso, Cana Coaunerate  
cocoainaain nelu. Acate rai:

“Iite canu calaohineein,  
enene canuhacha teineein  
neei,”

naelu. <sup>6</sup> Chaen techu, rai Quiricha Inoaensi  
cuhane:

“Iite chabana satonoelanaala  
saseredote neein neriquiin,  
aihalu Melquisedee ne rijijieeincha,”  
naain ne laenanohineein.

<sup>7</sup> Jaiti cana rai chauratane que ichaohane  
bana, atinaaururichaaaine caje ichoteratiha  
Cana Coaunerane coina, jataain chanaain,  
caje bajaa Jesocurisitone janate, jataain nere  
tonoraeranihane jaun, corootajanelu nii  
cairichaururichaaaine abaantana nainihane  
coina rai Inaca Cana Coaunera. <sup>8</sup> Nitohaneeinte  
Cana Coaunera Calahinihane saijieein,  
necairichaanaa coaraain nelu Jesocurisito,  
jeriha rai Inaca Cana Coaunerane rijijieein nena  
jerenacaun. <sup>9</sup> Nitohaneein jataain Inaca ere  
tonoraeraneein nihane jaunte, Aca, satiin nere  
tonoraain neinichaachene ichoterateraneein  
ne. <sup>10</sup> Nii jaunte Melquisedee rijijieein nena  
saseredote neein cocoainaelu Cana Coaunera.

*Jataainte elunae esenetaain nihancane  
jianichaane.*

<sup>11</sup> Niha jataain arajiin inara rai irihanune jaanu  
niqui. Nete jataain caaintate inara rai bihanune,  
cha aonaquichene nihanatiin coitucusineeichene  
jaun. <sup>12</sup> Inae niqui carajaa, inara cacha re-  
laeraneein neeichene jaanu rijijieein Jesocurisito

coitucuhin neeichene. Nete enanetjoeein caaintajelanaala cana relaa Cana Coaunerane jaan que nihanatiin nacoauneein inara relaera jerequiche. Nii jaunte aiha leinjiin canaanai ujuarine rijijieein neeichene jaun, iniho quinaa nainenihane jaun, itariicha cohajiha canaanai ujuarine rijijieein jataain caaintaelanaala nena que inara relaera jerequiche. <sup>13</sup> Nii itari coha canaanai ujuarine rijijieein, caaintajelanaala relaera jereraaurute, leinjiin canaanai rijijieein neein niicha ichai coitucuelanaala ichoae. <sup>14</sup> Nete laen nii iniho que cuaain inara relaanune jaan Cana Coaunera Ere neein nena ne. Acate, inae acaauruhacha coacui coitucuhin, “Naaonjoainte baaso ne,” jana, “Naaonjoainte caohacha ne,” naain coitucuhin nenacaauru rai benojoi ne.

## 6

<sup>1</sup> Aihane jaun, inae caohatiin jauriaanejeein Jesocurisito que nerelacaachelune jaun, inae leeochangeein coacuelanaala, ainaacha iicha cana suujuane reentiaain sacuhacachenete ne.

Inae nainihe nacoauneein jauriaanejeein esenetaacachene nunuhetihacachelune rijijieein neein, baaso ichaquichene coreniha cana nitaje rai nihacachelune rijijieein nena nainihaacache. <sup>2-3</sup> Raujiaain Cana Coaunera esenetaain, cachaauru baotisaain, biji que Jesocurisito esenetaeraauru dadaain acaauru rai Cana Coaunera bajaain, o caje ichanaain neeururichaain onacaaurune, nerichaain chabana satonoelanaala casetecone, naaonjoainuri coitucuhacache caohatiine jaun, jianein nena coacuelanaala que leeochoauru



relaacachenete ne. Jeriha Cana Coauneranete nitohaneen icharichaacheen.

<sup>4</sup> Nitohaniane jaun, inae le sajeen itolere coaraain coitucuhin, Cana Coaunera Suujue siriin, <sup>5</sup> jataain caohatoa cana rai Cana Coaunera beratenojone coitucuhin, itolere que jataain nelateineen nerichaaain caa baiha neeni janonaa quene coitucuhin, <sup>6</sup> naaonjoaain neeichene saijieen jianequichene, inae nacoaauneen jeriha Cana Coaunerane rijijieen ichaonaa naineriheicheen, coroso que Jesocurisito teen, nocoje chanuuruhane tocohaneein rai nocoje chanuha airiquicheene jaun. <sup>7</sup> Nete laen atane caohacha que temule jaera rai, atane setejiaa elone caohatiin omarohin inacaain nihane rijijieen, jeriha Cana Coaunerane rijijieen neeichene, inara rai caohacha ichaain inara coroatajanereen Cana Coaunera. <sup>8</sup> Jana nii temule jaera rai ojoa aina omane neeojoaain niha nii temulene rijijieen neeichenete, laen inara cojiotaain inara mocoeratereen Cana Coaunera.

*Canaacha cohajete leinjiin acaacha cohajihacachene icharaneen ne.*

<sup>9</sup> Nete, inara rai caritiin aitocooaunne rijijieen, inara inae jeriha Cana Coaunerane rijijieen ichaohin iiquichene coina, nichoterichaacheene esenetaaichene caje cuaain leeochangeen coacuelanaala neeichera canejeraauru. <sup>10</sup> Nii jaunte, chabana baaso ichaenihane jaun, nii enanetojoeen ichaquichene rijijieen, leeochangeen cana nejeraauru- canaacha esenetai esenetaeraauru belaiquichene coarateen, coroatajanequichelune baitenereen Cana

Coaunera. <sup>11</sup> Nete laen, jataain ainaacha iiquichene reeintiaain, acaacha cohajeein, esinae rauhijiriin corajeein ichaquichene coarateein, inaraacha ichai ichaquichene caohachae. <sup>12</sup> Coatiha chaque nelatihei chachaaain neeichene coiinteein ichaquichene. Charijieein teeinti itolere bana jianelanaala esenetaain neeuruhane jaun acaauru rai tihane coina Cana Coaunera aitoonjoa raeraneein neure esenetaeraauru, nii rijijieein neeuche inara netonai.

<sup>13</sup> Abaraaun rai niicha teeni tihane coina aitohalune banate, leinjiin Acaacha itolere amurijiriin nihane jaun, inae neniha amurijiriin neine jaun, aca Cana Coaunera neein coarajeein icharichaaaine coina: <sup>14</sup> “Canune ii coroatajaneein, arajiin janiinacajelanaala nefaauruha iicha foerateeurine coina ichareeunicha,” naain Abaraaun rai biha Cana Coaunerane jaun, <sup>15</sup> luhecaelanaala carajaain cojoaain, nii rai tihane coina Cana Coaunera aitoonjoa raelu Abaraaun. <sup>16</sup> Nete laen cachaauru cha chana jerecuruhane, “Cana Coaunera coarajihane jana icharihanine que,” aitiin ichae. Nii jaunte, cha chana jereein nihane esinae rauhijiriin icharihanine esenetaera coina, “Cana Coaunera notaracaae icharihanine coina,” aitohane, inae nene nenacaen rerohecaera. <sup>17</sup> Nii rijijieein techu, nii niicha teeni raeraneein neenihuri rai, aansijiinniji nii aitohane corelanaala, esinae rauhijiriin icharichaaaine coitucuuruhane coina, aca Cana Coauneraneein coarajeein icharihanine que aitelu Cana Coaunera. <sup>18</sup> Cana coritaelanaala niicha teeni naitoonjoan, aca-

Cana Coauneraneein coarajeein icharihanine coina, Cana Coaunera aitoonjoante raacache, Aca itolere baaso caje cana beraichaneein nihane coina, naitoonjoaacha cohajeein nihacachene jaun. <sup>19</sup> Nii cana rai niicha teeni-canaacha cohajeite, nitajihane coataa cana suujue nunaeranein ne. Charijjeein teeinti, cujuana nichajai que auriteein bote nunae rai nunaera- ancla, nalaa fichafichaanaane coataa nii rijijeein. Nii canaacha cohajeite chabana turunaa nainenihacache Teenforo cuhanai bujuaneein nena ne jaau- cana turuhaeranu que nenaaneein ne. <sup>20</sup> Nitohaneein ecu cana turuaeranu quete cana rai chabana satonoelanaala nena saseredotenein nelu Jesoso, aihalu Melquisedee ne rijijeein.

## 7

### *Saseredote inoaensi- Melquisedee rijijeeinte nelu Jesoso.*

<sup>1</sup> Nii Melquisedee jetaote- Cana Coaunera rai saseredote neein, Saleen batane curuaanaa neein nelu. Nii Melquisedee jetao techu, leeochoaauru curuaanaacuru reychuru cachaauru amuritiin sohin jitariin acaauruhacha sirii ruluha acauru cajene baiha caaujiha Abaraaunne jana, que tacaain cuhin, coroatajaniha Cana Coaunerane aina leeochoaauru amuritothane que aitiin cojio-taain corojelu. <sup>2</sup> Nitohaneein coroaecane jaun jetaote, nii leeochoaauru amuritiin sohin acauru caje niicha ruluhi lechooncanu telu rai Abaraaun. “Melquisedee” naane jetaote: “Caohacha ichara curuaanaa” naane aite. Jerichanejeein jetao

techu: “Saleen” naane: “Raotojoein nenea” naa aite. Nii jaun jetaote, nii Saleen batane curuaanaa nihane jaun: “Raotojoein nihacachene tera curuaanaa” naaure Melquisedee que. <sup>3</sup> Nihei coitucueraai rai inaca, rai neba, foerateracuru, naaonjoainuri. Niheichu coitucueraai nejanoa, ohin, naaonjoaane. Nii jaunte, acaihaniji chabana satonoelanaala nenea Cana Coanera rai saseredotenein ne, aihalu Cana Coanera Calahine rijjIEEEIN.

<sup>4</sup> Coaracuche nachuhinti jataain nelateineein niha nii Melquisedee ne jaun, nii leeochoauru curuaanaacuru cachauru sohin, niicha rului lechooncanu tihalu rai, cana foeratera inoansi Abaraaunne. <sup>5</sup> Moisesa tenojoi rauhite niqiu, Lebi nefoeratenein nenacaauruhachasaseredote neein leinjiin acaauruhacha, satiin cachauruhacha sirii lechooncanu raauruhane coina aitelu, satiin cachauru, acaauru araaineein- acaauru rijjIEEEIN Abaraaun nefoerate neeuruha acaauru netonoaine saijIEEEIN. <sup>6</sup> Nii Melquisedee coatiha laen niqiu, Lebi inamoco nihei. Nete nii saijIEEEIN, nii Cana Coanera aitoonjoa raeranein niha Abaraaun natiin, caje nii niicha rului lechooncanu bajaain Abaraaun cojiotaain corojaje. <sup>7</sup> Nii coitucuhacachene rijjIEEEINTE, nii cojiotaain niicha corojajei cacha amurijiriin nelateineein ne, nii cojiotaera. <sup>8</sup> Satiin caa chauratane que cachauru caje acaauruhacha sirii lechooncan raaurerate ooruhane rai neein aihure. Nete laen nii Cana Coanera Quiricha cuhane, Melquisedee que naitoonjoa enanetojoein jaiti ichaonaa que aitona rijitojoein aite. <sup>9</sup> Nii rai niicha rului

tiha Abaraaunne cajete, nii Lebi inamoconeein nenacaauru- saseredotecuru, enene cachaauru caje acaauruhacha sirii lechooncanu bajaain raeraneein neenihuru netonai, Melquisedee rai niicha sirii teuruhalune coitucuhacache. <sup>10</sup> Nii que taca cuha Melquisedeene jana, rai jaberoco cuhane jaiti najanoaelanaala neeuruha niicha foerateenihurune jana, rai niicha rului tihalu Abaraaunne jaunte, jaiti nejanoaelanaala netiin acaauru netonai acaauruhacha sirii lechooncanu tein neeurelu.

<sup>11</sup> Nii coitucuhichene rijijieinte, Aaroon foeratenojoinnein nena- Lebi inamocooru- saseredote neein nenacaauru aina cuaain, Isaraelitacuru rai rauhi tein nelu Cana Coaunera niqii. Nete nii rauhi tonoraeraauru, esinae rauhijiriin jeriha Cana Coaunerane rijijiein neeurenelu. Nii jaunte nacoaauneein saseredote letoaelu Cana Coaunera. Nete laen, nii niicha letoai Aaroon nefoerate caje nenaanelanaala nihalu Melquisedeene rijijiein nenaane. <sup>12</sup> Nii jaunte, nitohanein necoriha saseredotene jaun, Cana Coaunera rai rauhi netonai necore.

<sup>13</sup> Nii ena nena cana rai saseredote- cana Curuaanaate, leecha Isaraelitacuru lauri caje nena nihane que aitiin laenanohineein ne Cana Coaunera Quiricha cuhane. <sup>14</sup> Nii jaunte, nii coitucuhacachene rijijiein, Jodaa lauri caje nenaaneein nelu cana Curuaanaa. Jana Moisesa coatiha nii Jodaa lauri caje nerichaaain saseredotene coina coacuhin iriheilu, neeururichaaain saseredotecurune bihane bana.

<sup>15</sup> Nii jaunte, jataain caohati saseredote Melquisedee rijijiein niha, nii ena nena

cana Curuaanaa- saseredotene coitucuhacache.  
<sup>16</sup> Aihane jaun, coatiha aihuruha leeochoaurune  
 rijijiein, “Acate rai laurineein ne,” naain rauhi  
 cuhane laenanohineein nihei. Acate chabana  
 nitajenaachara ichaonaa caje unaaneein ne.

<sup>17</sup> Nii jaunte, nii rai:

“Iite Melquisedee rijijiein  
 chabana satonoelanaala  
 saseredote neein neriquincha,”  
 naa Cana Coaunerane, ne laenanohineein  
 Quiricha Inoaensi cuhane.

<sup>18-19</sup> Nitohaneeinte nii jauriaanejeein nena  
 rauhi, Moisesa rai rauhi, naaonjoain aina chaque  
 nelatenihane jaun, jeriha Cana Coaunerane ri-  
 jijiein cachauru ichao rucuhena nainenihane  
 jaun, itajeein nacoauneein jataain amurijiriin  
 nelateineein nena te Cana Coaunera. Acate laen  
 Cana Coaunera rene cana turuaeraneein ne.

<sup>20</sup> Chaen techu, aca Cana Coaunera neein  
 coarajeein chabana satonoelanaala nihane  
 coina, cocoinarihanine esenetaacachene  
 coina raajenhane aitelu. Jana leeochoauru  
 saseredotecuru, coatiha chabana satonoelanaala  
 neeuruhane coina, aca Cana Coaunera neein  
 coarajeein cocoinaane coina aitohi Cana  
 Coaunera. <sup>21</sup> Nete laen cana Curuaanaa, chabana  
 satonoelanaala nihane coina, aca raajenhane  
 coarajeein cocoinaane que:

“Canune  
 Cana Coaunera neein  
 caraajenhane coarajeein  
 icharihanuhine coina aitoon.  
 Nii jaun  
 nii caitoonjoan corerihaaunni.

lite chabana satonoelanaala  
saseredote neein neriquiin,”  
naain ne laenanohineein rai Quiricha Inoaensi  
cuhane.

<sup>22</sup> Nitohaneeinte nii jauriaanejeein  
nenea amuritoheriin nenea, cana rai Cana  
Coauneraacha teeni terateraneein nenaane  
Jesoso. <sup>23</sup> Leeochaauru jauriaanejeein saseredote  
neein nenacaaurute, cana rijijieein cachaneein  
neeuruhane jaun, arajiin neurelu, ohin nii  
baiha ichanana nainecurenihane jaun. <sup>24</sup> Nete  
laen Jesoso ohin nitajenaa nainenihane jaun,  
leinjiin acaacha chabana satonoelanaala cana rai  
saseredoteneein ne.

<sup>25</sup> Nii jaunte, aina cuaain Cana Coaunera  
coacuhin ichaonacaauru ichoteratereein  
chabana satonoelanaala nihane rijijieein,  
acaauru netonai chabana satonoelanaala Cana  
Coaunera aina neeuruhane coina. Nitohanihane  
jaunte, chabana ohenihane jaun, itolere  
bana satiin esenetaeraauru coreniha bajaee  
bajaareein Cana Coaunera caje.

<sup>26</sup> Nitohaneeinte esinae rauhijiriin canaacha  
latei saseredotecuru curuaanaacuru Curuaanaa  
neein letono neein ne Jesoso. Acate Saantoneein  
baaso colane- niheichu osaquelanaala-  
osaaonacaauru caje, jelai dedeeu tenojoineein  
ne. <sup>27</sup> Coatiha leochaauru saseredotecuru  
rijijieein, jauriaanejeein rai nosa coreniha, nii  
baiha cachaauru osa coreniha, naaonjoaain  
iniho mocohin Cana Coaunera rai tihane  
coina nenea nihei. Nitohanelanaalate, le  
sajein chabana coaiten ohenihane coina,  
raajenihane cana coreniha rai jaberoco telu

sohin atinaauruhane caina. <sup>28</sup> Jana nii Moisesa rai rauhi que cocoainanohineein nenacaauru saseredotecurute- nechu joaereein cachaneein osaaonaneein neeurelu. Nete laen, nii Moisesa rai rauhi que cocoainanohichuru baiha, ena nena saseredote cocoainaane caina, aca Cana Coaunera neein coarajein icharihanine que aitohalune jaan, rai Calahineein osaquelanaalachabana satonoelanaala saseredote neein nihane caina cocoainaelu Cana Coaunera.

## 8

*Ena nena- cana rai, Cana Coauneraacha teeni terateraneein niha Jesoso ne.*

<sup>1</sup> Nii cana rai saseredote curuaanaacuru Curuaanaa- caa inara rai ereereecaaunne jaante-jataain itolere amurijiriin nelateineein Cana Coaunera rijijieein nihane jaun, Cana Coaunera nelaurihanaja raotono nichajai que nelauriaelu Cana Coaunera rohan. <sup>2</sup> Acate cana rai esinae rauhijiriin saseredote esine neein Cana Coaunera ichanohineein nena- *santuario* cuhane neein, Cana Coaunera rene cacha turuaeraneein ne. Coatih aihuruha leeochoaauru saseredotecurune rijijieein, raajenihane cacha ichanohineein nena- *santuario* cuhane nihei. <sup>3</sup> Satiin saseredotecuru Cana Coaunera rai chaelai teraneein, inihocuru mocohin teranihane caina cocoainanohi nihane jaunte, Jesocurisito netonai nii rijijieein cana osa coreniha raajenihane netelu atinaauruhane caina. <sup>4</sup> Coatih caa chauratane caje nena nihane, saseredote nena nainerihe. Inae caa chauratane que arajiin neuruha saseredotecuru, Moisesa rai



rauhi cuhane aithane rijijieein niqui, Cana Coaunera rai nii Teenforo asaae lenonecuru sohin mocooruhane coina. <sup>5</sup> Nii saseredotecurute, nechu dedeeu ichacuruhane cojunacaneein nitohanei icharaneein neeurelu. Canate esinae rauhijiriin, nechu dedeeu nenacaauru rijijiei icharaneein ichacuruhane coitucuhacache, *santuario* ichaa Moisesane coina rai: “Aonaun. Nii ichei ichatane ucuunno coaratihanulune rijijieein ichaaura,” naalu rai Cana Coaunerane caje. <sup>6</sup> Nete cana rai saseredote laen, jataain nii leochaauru amurijiriin, jataain cana rai caohacha ichaain, cana rai tihane coina aitovalu Cana Coaunerane rijijieein, Cana Coaunera rene cana turuaeraneein ne.

<sup>7</sup> Bana caohachaain cachaauru ichao rucuhena nainiha, nii jauriaanejeein nena Cana Coauneraaacha teine, coatiha neriheilu Jesocurisito caa ena niicha tei ichaane coina.

<sup>8</sup> Nete nii jauriaanejeein niicha tei rijijieein neeureniha cachaaurune jaun:

“Inae cojoanonaa que turuhane banane,  
 Israeli, Jodaa, naaonjoainuri aina,  
 enachasine canuhacha ichaneni  
 ichareeunnicha.

<sup>9</sup> Nii ena acaauru aina  
 canuhacha ichanenu,  
 coatiha  
 Egipto batane caje  
 acaauru foerateracuru  
 rocohanulune coina,  
 canuhacha ichailu rijiirinaai.  
 Nene,  
 nii acaauru aina  
 canuhacha ichanenu  
 tonoraelanaala

ichaaoruhane jaun,  
acaauru que jaolecoonlu.

<sup>10</sup> Nii caa baiha Isaraeli aina  
canuhacha ichanenute,  
acaauru suujua cuhane laenanohineein niha  
Canu rai rauhine,  
suujua caje coauneein  
coitucuuruhane coina  
canuhacha ichanenu ne,  
Canu,  
acaauru Coauneraneein  
nihanune coitucuhin,  
canu cachaneein neeuruhane coina.

<sup>11</sup> Nii bana,  
inae le cachaauru,  
leeochaauru,  
acaauru laurichuru,  
acaauru araaichuru,  
naaonjoainuri,  
inae Canu que  
ita relaauruhane latelanaalate,  
Canu,  
acaauru Coaunera nichaaunne  
coitucuurureein  
satiin ichauhenaauru,  
canaanaihunru,  
naaonjoainuri.

<sup>12</sup> Nii banane  
baaso ichacuruhane que casuujua acateein,  
acaauru osa que canu suujua acatereeunni,”  
naelu Cana Coaunera.

<sup>13</sup> Nii cana rai nacoauneein enachasine niicha  
ichanenu biha Cana Coauneranete, inae chaque  
nelatelanaala nitaje rai niha nii jaurihaanejeein  
niicha ichanenune coitucueratiha aite.

## 9

### *Santuario chauratane que nenaalu aina dedeeu nena santuario.*

<sup>1</sup> Nii jauriaanejeein Cana Coauneraacha teite, caa chauratane que rene nichuuntaauruhane jaanu que *santuario* neein telu Cana Coaunera.

<sup>2</sup> Nitohaneeinte, nii jauriaanejeein *santuario* neleru asaae jetao nelu leinjiin usi nujua, leinjiin mesa Cana Coaunera que banijiaain nena faan siriin, naaonjoaain.

<sup>3</sup> Jana, que jauriin nena bujua cuhane jetaote, jelai teein Cana Coaunera turunajaneein curuajaclu.

<sup>4</sup> Nii cuhane jetaote, nelu oro caje ichanohineein nena rori, jujui- incienso mocooruhane jaanu que, chaen camela itolereneein oro que carihanojoneein nena.

Nii camela cuhane jetaote nelu, oro caje ichanohineein nena-leinjiin baichaje, cuhane manaa neein curuajaain nena quinacai- manaa siriin.

Chaen jetao techu, nii camela cuhane nelu Aaroon bastoon omaronalu, Cana Coaunera rai rauhi- ajeri caje nena tabara que teein laenanohineein nena, naaonjoainuri.

<sup>5</sup> Nii camela ichoae jetaote nelu- coroatajai cacha rijiinanai itaroojianaain. Acauru jetaote, ecu niha Cana Coaunerane beraneein jetao, nii nitaro que nii camela fuera asaraneein ne.

Nete ena nelatene jitariin nii coitucuerateein niique irihacane.

<sup>6</sup> Inae nitohaneein satiin ichanohineein nihane jana jetaote, itolere bana nii nunuheneein nena- Cana Coaunera rene nichuuntaauruna jaau turuure saseredotecuru, ecu Cana Coaunera rene nichuuntaain ereereecuruhane

coina. <sup>7</sup> Nejetaote nii que jauriin nena- jelai teein Cana Coanera turunaja neein nenaau jetao, saseredote curuaanaacuruhacha ecu turue le sajeein le jaanacaauru nainein. Ecu enohane nainein jetaote, lenonecuru coichana amaaure, jauriaanejeein rai nosa coreniha teein, nii baiha coitucuelanaala neosateeuruha cachaaaurune coreniha tihane coina. <sup>8</sup> Niite cana que coitucuerate Cana Coanera Suujue, nii nunuheneein nena- Cana Coanera rene nichuuntanaanaja neein nihane jaun, jaiti neniha nii jelai teein Cana Coanera turunajaaun cana turuaerane jaun, ecu turunaa nainenihacachene que. <sup>9</sup> Satiin niite, nechu cau jaiti ichaohacachene tonohanau cana que coitucuerateranu que nelu. Nii itolere inihocuru mocohin Cana Coanera belaihuruhane jaan, coatiha nitohanei ichaain coroaeraauru cachaauru suujua couluoona nainiheilu. <sup>10</sup> Acate raujiaain lenonecuru, conacaihuru, naaonjoainuri couluoraneein, cachaauru netonai chatoanai ichacuruhane, rai jaberoco caje niicha ichai jaoruhane coarateeuruhane jaanu que nelatelu, cana suujue coriha Cana Coanerane que turuhane reentiaajeein.

<sup>11</sup> Nete laen inae turuhelu Jesocurisito. Acate enene inae cana rai saseredotecuru curuaanaa Curuaanaa esineneein- chabana satonohelanaala nereein. Nii saseredote neein niicha ichai ichaane jaan- *santuariote*, esinae rauhijiriin nesineneein nena ne. Coatiha raajenihane cacha chanohineein nena nihei, niheichu cau chauratane que nihei. <sup>12</sup> Nitohaneeinte *santuario* cuhane eno-

helu Jesocurisito, coatiha aihuruha caa chau-ratane que nenacaauru saseredotecurune rijijieein, Cana Coaunera rai, cabara curuanaa, toro narejeen, naaonjoainuri coichana tihane coina nihei. Acate raajenihane rai coichana tihane coina, le sajeein enohelu chabana coaitenihane coina. Nitohaneeinte cana rai ichaonaa chabana satonoelanaala nena teraneein nihane jaanu raelu. <sup>13</sup> Esinaete niqui, nii toro narejeen coichana, cabara curuaanaa coichana, baca narejeen moco bajane, naaonjoaainunri que, chaaelai Cana Coaunera que banijiaelanaala nena cabuuruhane couluoorejetelu, Cana Coaunera que banijiaaaineein nihane coina. Nete laen cacha suujue couluoona nainenelu nii ichanacuru. <sup>14</sup> Nete laen jataain nii amuritoheriin nelateineein ne Jesocurisito coichana, aca Cana Coaunera Suujue, chabana nitajenaacharanejeein nena aina cuaain, raajenihane Cana Coaunera rai cana coreniha ohane coina netihalune jaun. Nitohaneeinte cana suujua letononeein, canaacha ichai coreniha, cana nitaje rai nena caje, cana suujua coreein nelu nii rai coichana- osa colane nena-Cana Coaunera jerei ichaain nihacachene coina.

<sup>15</sup> Nii coinata ohelu Jesocurisito, ena nena Cana Coauneraacha ichaneni aina cuaain, ichoaichaniha neein onacaaurulu, ena neinichaachene, naaonjoainichaachene Cana Coaunera aina cana tihane, nii inoanlu jauriaanejeein niicha ichai, raujiaain cachaauru osa bujuateraneein nihane caje, acaauru osa que suujua acatena nainiha Cana Coaunerane, satiin niicha ranojoneein nenacaauru netonai nii naitoonjoa niicha teeni chabana satonohelanaala

nena ichaonaa raeraneein neeuruhane coina. <sup>16</sup> Oha cachane baiha, rai rucuhele niicha cocoirichai raauruhane coinate, jauriaanejeein oha nii cachane coitucuuruhane rai ne. <sup>17</sup> Nii jaun, jaiti oheniha nii rucuhele erora cachane, coatiha nii niicha cocoirichai rucuhele ranaa nainihehi cacha. Inae ohane baihate laen naine nii rucuhele raa nii banihatihane jaan ne. <sup>18</sup> Nitohanihane jaunte, nii jauriaanejeein nena Cana Coanera ichai tonoracuruhane coina, carenero sohin rai coichana chororejetucurelu. <sup>19</sup> Jerichanejeein jetao techu, aina nenacaauru cachaauru rai jetao, nii Cana Coanera aitoonjoa rauhi bihane baiha jetao, carenero ujui caje, lana caje ichanohi cajione lanajai aina, leinjiin enuha- isopo uune raain jetao, toro narejeencuru, cabara curuaanaa, naaonjoainuri coichana acau que jasiitenohineein nena que setejiain jetao, Cana Coanera tenojoi rauhi laenanohineein nena ichoae riajaain cachaauru ichoae netonai riajae Moisesa. <sup>20</sup> Nitohaneein acaauru ichoae riajaain jetaote: “Caate nelaterichaaain nii cana rai tonoraacachene coina Cana Coanera tenojoine coitucuhichene coina, coitucuerateraneein nena Cana Coanera icharatenohi ichananera,” nae jetao Moisesa. <sup>21</sup> Chaen jetao techu, loanari *santuario* aina, nasaae enohane saseredote rai nelatenei corujueleuru, naaonjoainuri ichoae riajae Moisesa. <sup>22</sup> Nitohaneente, satiin itolere coichana que rujuaain, jelai tein culuoonojoineein nihane coina aitelu nii rauhi. Nii jaun, neniha coichana joera cana corenihane, nerihei cana osa que suujua acatiha Cana Coanerane jaanu.

<sup>23</sup> Nitohaneente carenerocuru sohin rai coichana que, nii dedeeu nenacaauru cojunaca neein nenea couluoocurelu. Nete laen, jataain nii amuritoheriin couluoora latelu nii dedeeu esineneein nenea.

*Cana osa caje cana rocoeranu quete ohelu Jesocurisito.*

<sup>24</sup> Coatiha nii Cana Coaunera nenaja esine cojunacatiha cachaauruhacha ichai asaae enohilu Jesocurisito. Acate rauhijiriin Cana Coaunera nenaja dedeeu cuhin, Cana Coaunera rai, enene cana coreniha iriha ne. <sup>25</sup> Coatiha aihuruha saseredotecuru curuaanaacuru, le jaanaca naineein nejelau coichana teuruhane coina araai saain nii *santuario* enohine rijijieein, araai saain ohilu Jesocurisito. <sup>26</sup> Nitohanihane chujianra, necoaunaa cana rai chauratanene caje coauneein, ore araai saain Jesocurisitona. Nete aca satononiha ecocohin- le sajeeincha raajenihane neteein ohelu- chabana satonoelanaala cana osa caje cana rocoeranu que. <sup>27</sup> Charijieein teeinti le sajeein ooruhane caseteco coaracure cachaauru, <sup>28</sup> nii rijijieeinte le sajeein atinaain, arajii cachanichaane, osa aina nenea caje cana rocoeranu que tenojoineein nelu Jesocurisito. Inae nacoauneein tururichaaain niqii. Nete osaaonacaacuru ichoteratihane coina ainereein, esenetaain acaacha cohajeein nenacaauru ichoteratihane cointate aicheein.

## 10

<sup>1</sup> Nii Moisesa rai rauhi, nechuhau raujiaain nii turuha uhenenilu rijijieein nihalu nesinenelanaalane jaunte, acaauru osa caje- nii

le jaanaca naineein- araai saain jeelai lenonecuru mocohin Cana Coaunera rai teeurera couluoona nainenelu. <sup>2</sup> Bana nii acaauru osa caje acaauru couluooca nii Moisesa rai rauhine jana nihanete, inae osa caje couluoonohineein neeuruhane coitucuhin, inihocuru mocohin teeuruha Cana Coaunera raine jianecurure. <sup>3-4</sup> Nete nii toro narejeencuru, cabara curuaanaa, naaonjoainuri coichana, acaauru osa caje, acaauru couluoona nainenihane jaun, osaaonaneein neeuruhane coaauca, nii le jaanacaauru naineein, nii inihocuru mocohi teure Cana Coaunera rai.

<sup>5</sup> Nitohanihane jaunte, inae chauratane que uhane rai:

“Ii rai lenonecuru teein,  
que ii belaihuruhane  
jereneeine jaunte,  
ii rai canu jaberoco tihanune coina  
caletoaaicha.

<sup>6</sup> Niheichu  
acaauru osa caje  
couluoonaquine coina,  
ii rai iniho mocohin teein,  
chaaelai que  
ii belaihuruhane coina jeriheei.

<sup>7</sup> Aihane jaun, nocoaaun,  
nii Quiricha cuhane  
laenanohineein nihane rijjijeein,  
iicha jerei icharaneein  
nihanune coinara  
Cana Coaunera,”  
naelu Jesocurisito Cana Coaunera rai. <sup>8</sup> Niritiin  
nii acaauru osa caje couluonajaane coina, rai



lenonecuru sohin teein, chaelai que belaihuruhane coina aitiin, rai lenonecuru mocooruhane coina aitiin, naaonjoaan, rai naitoonjoan rauhi rijijieeine saijieein, rautaeniha Cana Coaunerane que rai aitohane baihate: <sup>9</sup> “Nocoa inae cuhanu iicha jerei ichacaaunne coina” naain aite Cana Coaunera rai. Nitohaneeinte nii lenonecuruhacha sohin teeuruhane coina nena rauhi itajeein, raajenihane rai jaberoco tee, ena nena cana rai Cana Coauneraacha teineein nihane coina. <sup>10</sup> Nitohaneein jeriha Cana Coaunerane rijijieein, le sajeein chabana coaitenihane coina, cana coreniha ohane coina, raajenihane rai jaberoco tihalu Jesocurisitone corenihate, cana osa caje cana couluocoelu Cana Coaunera.

<sup>11</sup> Chabana osa caje cacha couluoona nainenihalenonecuru sohin teeuruhane saijieeinte, satiin saseredote Jorioneein nenacaauru, araai saain itolere bana lenonecuru sohin teurelu. <sup>12</sup> Nete laen Jesocurisito, le sajeein, chabana coaiten ichaenihane coina, osa coreniha rai jaberoco tihane baiha, Cana Coaunera rohan nelauriaelu. <sup>13</sup> Ecute ena neein, que nejeratenacaauru amuritoeratiha Cana Coaunerane cojoae, <sup>14</sup> rai jaberoco teein coreniha Cana Coaunera cachaneein neeuruha cachaurune coina couluocane jaun. <sup>15-17</sup> Jana Cana Coaunera Suujuete:

“Inae chabanani  
 acaauru rai canuhacha ichanenite;  
 acaauru suujua cuhane laenanohineein niha  
 Canu rai rauhine,  
 suujua caje coauneein coitucuuruhane jaan  
 nereein.  
 Nii jaun inae nenacaeneein

acaauru osa aina baaso ichacuruhane coaauri-  
haaunni,”  
naain aitohalu Cana Coaunerane coitucuerate  
cana que.

<sup>18</sup> Aihane jaun, inae nitohaneein cana osa que  
suujua acatiha Cana Coaunerane jaun, inae naini-  
hei nenacaaen osa coreniha iniho mocohin tenaa  
nainihehi cacha.

*Cana Coaunera rohan nichuuntaacachenete ne.*

<sup>19</sup> Nitohanihane jaunte rai coichana jaohin  
ohalu Jesocurisitone coreniha, aina cuaain,  
inae enene nainichaache, chaque casilanaala  
tonajelanaala Cana Coaunera nenaja esine  
*santuario* turuhacachenera canejeraauru.

<sup>20</sup> Nitohaneeinte Cana Coaunera rene turunaa  
nainenihacachene jaan bujuateraneein nena  
itajeein, nii ena nena ichaonaa que turunaa  
nainichaachene jaanu ajiinchateraneein,  
rai jaberoco telu Jesocurisito. <sup>21</sup> Nii jaunte

Jesocurisito cana rai saseredote esine neein  
nihane jaun, aca Cana Coaunera nenaja acatiha  
cana turuaeraneein ne. <sup>22</sup> Aihane jaun cana

suujua cuhane asinojoneein cha coacuelanaala,  
niheichu leecha coacuelanaala, canaacha  
cohajeicha que coacuhin, esinae rauhijiriin  
cana suujua cuhane coitucuhachene saijieein,  
chachaain nihacachene jianein, Jesocurisito  
aina cuaain couluonojoneein Cana Coaunera  
rohan turuhacachenete ne. <sup>23</sup> Nii jaun coujurihu

Jesocurisito esenetaeraneein nihacachene  
jaun, itolere bana esenetaacachene rijijieein  
nihacachenete ne. Inae ecu tihane bana, cana  
rai niicha teenu naitoonjoalu terichain Cana

Coaunerane jaun. <sup>24</sup> Nitohanihane jaun ita rijijieein caohachaain neein, itolere bana ita belaaain nihacachene coina, ita coroatajaneein nihacachenete caohachae. <sup>25</sup> Aihane jaun nainihe iihuruha leeochoaurune rijijieein, ita aina netaojiaain ereerecaachene coiinteein jianena nainihaacache. Coiintelanaalate naine, inae tururichaaain Cana Curuaanaa cojoanonaa que turuelalajihane que nainaain, jiniiquin itaque corajerateein, ita rai coitucueratihacachene caohachae.

<sup>26</sup> Jana inae raotojoein Jesocurisito coitucuhin nihacachene saijieein, naosatena coacuhin nihacachene inae nerinaain nacoauneein cana osa coreniha ohenu. <sup>27</sup> Nechu usi tabai jana necairichanaa coaraain nitajeeururichaaain Cana Coaunera coitucunaa jerelanaala que nejeratena rijijieein nenacaaurune que banijiaain nenaachate cohajerichaacheein. <sup>28</sup> Chunocoha, Moisesa rai rauhi tonoraelanaala nihane jana, neeuruha nichatajaain coaraain beeureranete, cairichaojoaain coaraelanaala, sohin jaaorurejetucurelu. <sup>29</sup> Tana, nii amurijiriin casetecanohiniha cuururichaaain, chaque nelatihei rijijieein Cana Coaunera Calaohi teein, cana coreniha ohin rai coichana jaohin naaonjoaan, cana belaiha Cana Coaunera Suujuene saijieein, que jaolequiin nenacaaurune coitucuhichene. Nii rai coichana cana coreniha ohin niicha joailute niqui, acauru rai niicha teeni terichaaain Cana Coaunerane coitucuerateein, jelai teein Cana Coaunera cachaneein neeuruhane coina, acauru couluooraneein nenaane. <sup>30</sup> Chaen techu:

“Canuna cachaauru rai caohacha icharaneein coretereunni,” naain “Cana Coaunerate rai cachaauru rucuhereein,” naelu Cana Curuaanaa. <sup>31</sup> Nii jaunte, jataain coasihacaine Cana Coaunera nere tonoraain nenihacane.

<sup>32</sup> Nete inara, jauriaanejeein Jesocurisito esenetaaichene nunuheneein, itolere que laraajiin necairichanaa abaantaachelune coaaquichene caohachae. <sup>33</sup> Inara tabaaurute, satiin notaracae teein nocoeje chanuhin bisihururejetelu. Nii jana inara tabaaurute, inara aina jiniiquiin necairichaaurejetelu inara coinaderaa. <sup>34</sup> Jerichanejeein techu, cairichaaajoaain caresero cuhane nenacaauru coaraain acauru coinaderarejetocoichelu. Chaen techu inara rucuhelu ruluuruha inara cajene nihanatiin, raotojoein rachoojoein nerejetocoichelu cochunaelanaala. Inae nii amurijiriin chabana nitajenaa nainelanaala dedeeu niha inaraacha raenine coitucuhichene jaun. <sup>35</sup> Aihane jaun, jiaonriha nitohanein rariquicheeine esenetaain ichaohichene jianiquichene. Acate inara rai jeelai amuritoheriin cainareein. <sup>36</sup> Nii jaunte, jataain jeelai amuritoheriin necairichanaa abaantaain nena nainequichene jaanu que, itolere que laraajiin neeichene jaanu latequiche. Cana Coaunera jerei ichajeein ichaohichene, tihane coina naitoonjoa raeraneein neeichene coina. <sup>37</sup> Nitohanihane coinat:

“Inae ena caeneenejelanaalate turoreein nii turuha uheni.

Coatiha inae carajarihaain.

38 Canu cachaneein, canuhacha esenetaain  
 ichaonacaurute,  
 chabana nitajeeurenereein. Nena laen canu  
 cachaneein  
 nihane jianein, jauriaa ichaohalune rijijieein  
 ichoai que  
 nejeratereeunni,”  
 naalu Cana Coaunera, ne laenanohineein  
 rai Quiricha inoansi cuhane. 39 Jana cana,  
 coatiha nii rai cachaneein neeuruhane jianein,  
 jauriaa ichaoruhane rijijieein ichaonacauru  
 caseteco coaracuruhane rai nenacauru  
 nihaacache. Canate esenetaain ichaoruhane  
 jaun, ichoteratenojineein neeururichaaaine rai  
 nenacauru rijijieein nihacache.

## 11

### *Cana Coaunera esenetaain niha cachane*

1 Esinae rauhijiriin Cana Coaunera esenetaa-  
 canete, chabana canaacha coaraai terichaaain  
 cana raine cohajeein ichaohaca. 2 Cana fo-  
 erateracurute raujiaain esenetaauruhane jaun,  
 cache caohacha rijijieein acauru coarae Cana  
 Coaunera.

3 Cana Coaunera esenetaacachene jaunte,  
 nereecha que chauratane coaunalune  
 coitucuhacache. Nii jaunte, chabana cacheacha  
 coaraai caje coaunanojineein nene, caa enene  
 canaacha coarai.

4 Cana Coaunera esenetaane jaun techu, nii  
 rai nihana Caain amurijiriin, jataain caohacha  
 nejesina mocohin que Cana Coaunera belaiha  
 Abeline jaun, caohacha icharaneein raain nii  
 rai niicha tei raelu Cana Coaunera. Nii jaunte,

inae ohalune saijieein enanetojoeein Abeli coaaucaache, Cana Coaunera esenetaeraneein nihane coitucueratiha cana quene jaun.

<sup>5</sup> Cana Coaunera esenetaane jaun techu, nabana ohane coataa jaberoco neein Enoco raa Cana Coaunerane jaun, inae nii baiha coarihurenelu. Cana Coaunera Quiricha inoensi cuhanete, jaiti raeniha Cana Coaunerane ajiniha, jeriha Cana Coaunerane rijijieein ichaohalu Enocone que aite.

<sup>6</sup> Nete esenetaenihane Cana Coauneraacha jerei ichajeein ichaonaa nainene chuni cache. Cana Coaunera aina nena jerichaanete, niha Cana Coaunerane esenetaain, aina nena jerenacaau, niicha jerei ichajeein ichaonacaauru cainaeraneein niha Cana Coaunerane esenetae esenetaera.

<sup>7</sup> Cana Coaunera esenetaane jaun techu, inae chabana acaauruhacha coaraai icharichaaaine been suujuatiha Cana Coaunerane tonoraain, leinjiin bote tabai jaelu Nohe, cuhane rai comasai aina saain rai bereecuru aina nichotihane coina. Nitohaneein esenetaane jaun techu, nii esenetaelanaala chauratane que satiin nenacaauru cachaauru caseteco coaracuruhane jana, esenetaain nenacaauru ichoteratenojoeinein neeruhane rijijieein ichoteratenojoeinein nelu Nohe.

<sup>8</sup> Nii rijijieein techu, Abaraaun netonai Cana Coaunera esenetaane jaun, cotihacane tonoraain rai natane ratiriin, nii cunaja jelai coitucuelanaala cuhin, esenetaeraneein nihane cainaeraneein, rai Cana Coaunera teenu atane que ichaoha cuelu. <sup>9</sup> Nitohaneein Cana Coaunera esenetaane jaunte, nii rai Cana Coaunera teenu

atane que leeocho atane caje unaaneein ichoaelu Abaraaun. Ecu jetaote, neloheritelanaala raujiaain loanariicha asaae ichoaelu, aihuruhalu nii rai, Cana Coauneraacha tei raeraneein neeninunru Isaca, Jacobo, naaonjoainurine rijijieein. <sup>10</sup> Cana Coauneracha ichai- chabana nitajenaachara nese que ichaonaa jerihane jaunte, leeocho neseu cuhin ichoaelanaala loanariicha asaae ichoaelu Abaraaun.

<sup>11</sup> Cana Coaunera esenetaane jaun techu, inae camotojoe nihane jaun canaanai sirina naineniha Sarane jana, inae Abaraaun netonai biinaa nihane saijieein, rai naitoonjoan icharihani nohanelanaalane esenetaane jaun, lararajiaa Cana Coaunerane aina nelararajiaain canaanai sirilu Abaraaun. <sup>12</sup> Nitohaneeinte, inae jataain biinaa nihane saijieein, janiinacajelanaala cucuana cuhane nenea carene catu aina arasijie jeeoneein, cachaauru foerateraneein nelu Abaraaun.

<sup>13</sup> Satiin nii cachaaurute ohelu, jaiti nii acaauru rai tihane coina Cana Coaunera aitoonjoa jitaain raelanaala. Nete jataain Cana Coaunera esenetaauruhane jaun, nota que coara rijijieein coitucuuruhane jaun, nechu leeocho atane caje unaaneein, caa cana rai chauratane que ichaaoruhane coitucurelu.

<sup>14</sup> Nitohaneein ichaaoruhane coitucuhacachene cajete, jaiti caa chauratane que, nii acaauru rai Cana Coauneraacha teenu chabana satonoe-lanaala acaauru ichaonajaanu atane raurenihalune coitucuhacache. <sup>15</sup> Bana nii jeelai natanecha que coaacuruhane jana nihanete, jelaaha caaururelu. <sup>16</sup> Nete nii acaauru rai Cana Coaunera teenu atane raauruhane coina, jelaaha

caunaa nainecurenelu. Nii atane acaauruhacha raaenute dedeeu nenaane. Nii jaunte, nitohaneein acaauru que leinjiin nese banihateein rucuhecane jaun, acaauru Coauneranein nihane coejene Cana Coaunera.

<sup>17</sup> Nitohaneein Cana Coaunera esenetaane jaun techu, esenetaane cojuha rai calaohi Isaca sohin mocohane coina, rai aitha Cana Coaunerane jana, Isaca sohin mocoha nejerelu Abaraaun.

<sup>18</sup> Nitohaneinte: “Ii calaohi Isaca cajete nefoerateeurerein iicha foerateeuricha” naa rai Cana Coaunera natiin, acaihaniji rai calaohiniha Isaca ne saijieein rai sohin mocoha Abaraaun ne jere Cana Coaunera. <sup>19</sup> Ohane caje, cacha ichatena nainiha Cana Coaunerane esenetaane jaunte, nii rai calaohi atinaain tihane jere Abaraaun. Nii jaunte, Cana Coaunera rai tihane baiha, nacoauneein nii rai calaohi raelu. Nitohaneinte jataain chaque nelateineein nelu nii Abaraaun.

<sup>20</sup> Cana Coaunera esenetaane jaun techu, rai calaohichuru- Jacobo, Esao, naaonjoainuri coroatajanerichaaain Cana Coaunerane coitucuhin cojiotaelu Isaca.

<sup>21</sup> Cana Coaunera esenetaane jaun techu, inae ohane rai netiin, rai calaohi Jose calaohichurule cachaauru cojiotaain coroatajanerichaaain Cana Coaunerane que aitiin, rai nunera que netemeriaain, Cana Coaunera corojelu Jacobo.

<sup>22</sup> Cana Coaunera esenetaane jaun techu, inae ohane rai netiin, Egipto caje mituururichaaain rai naraaichuru Israelitacurune que aitiin, rai jaberoco amaauruha acaauru jiniichaaaine coina aitelu Jose.



<sup>23</sup> Cana Coaunera esenetaauruhane jaun techu, canaanaihuru soaajeratiha Egipto curuaanaa *reyne* jana, nejanoaa Moisesane jana casilanaala, nichata ateein asinojoneein aina sirichurelu, jataain caohachajei canaanai nihane jaun, rai fojiaraauru.

<sup>24-25</sup> Cana Coaunera esenetaane jaun techu, *Rey* Faraaon cacunu, calaohi rijijieein nenea jerenihane jaun, inae ichauhenaneein rai naraaichuru-Cana Coaunera cacha neein nenacaauru aina jini-inquiin cairichanojoneein nelu Moisesa. Jaiti caa chauratane que osaonacaauru aina ichaohane bana. <sup>26</sup> Nitohaneeinte, jataain Cana Coaunera esenetaane jaun, rai cainarichaa in Cana Coaunera ane coitucuha nota que coara rijijieeine jaun, Egiptoo raotojoei ichaonaa que ichaonaa nainihalune que jaolequiin, jataain nii amuritoheriin nelateinee in cacha ichoteratera- Mesihasi rijijieein cocainanohinee in necairichanaa jerihane jaun, naraaichuru rene cuelu Moisesa.

<sup>27</sup> Cana Coaunera esenetaane jaun techu, sohin jaohane coina arichatiha curuaanaa *reyne* jana, casilanaala Egipto batane caje amuhin, ecu aina neein coarajiha Cana Coaunerane jana ainaan rijijieein, Aca jerihane rijijieein nelu Moisesa.

<sup>28</sup> Nitohanee in esenetaane jaun techu, besetane in neeni- Fasocoa janonaa nunuhe bitoaain, sati in Isaraelitacuru nenaja bacuujuuauru rujuerate ichana que Moisesa. Nabana Isaraelitaneauruhane calaohichuru ajichacuru atinaa Cana Coaunera letono anjerane coataa.

<sup>29</sup> Cana Coaunera esenetaauruhane jaun techu, atane jacoro que ainaa rijijieein, cucuana

jera jaaorelu Isaraelitacuru. Jana Egipto cocoaichacuru acaauru caaijie cuhalaain satiin naluhin oorelu.

<sup>30</sup> Cana Coaunera esenetaauruha Isaraelitacurune jaun techu, caainsi janoneein cojoanonetojoein cuhin, caainsi saneein Jericoo nese tinonocuruhane jana, neranuha tinonoritiin nenea nii ajeri caje ichanohineein nenea nii nese tinoritiin ucuuneti rijiane jana, satiin cocoaichacuru sohin jaaorelu. <sup>31</sup> Cana Coaunera esenetaane jaun techu, nii Jericoo nenacaauru cachaauru sohin jaaoruhane ucuatoha, nii ecu nenea ene cojoaelorohe sohin jaaorenelu. Nitohaneein esenetaane jaun, acaauru letonocuru coroatajai cunacaauru raa raotojoein rai loreri asaane jaun.

<sup>32</sup> Jaitite lanacure Gedeeon, Baraca, Saansoon, Jefete, Rabiri, Samoeri, chaen *profetacuru*, naaonjoainunri que inara rai irihanune, nena inae jianeun. <sup>33</sup> Satiin niichuru jetaote, Cana Coaunera esenetaauruhane jaun, lauri lauri nenacaauru atanecuru ruluhin jetao, jeriha Cana Coaunerane rijijieein ichaain jetao, acaauru rai niicha teeni Cana Coaunera aitoonjoan atane raarelu. Tabaauru leon ucuha cuhane jaonojoinecuruhane nihanatiin quinaa nainenelu leon, leoncuru ujuae fuhane coina, rai anjera letoaa Cana Coaunerane jaun. <sup>34</sup> Jana tabaauru jetaote, Cana Coaunera esenetaauruhane jaun, usi tabai jana jaonojoinecuruhane nihanatiin, tonajelanaala usi caje nichoteeurelu. Chaen tabaauru jetaote, sabere caje nichoteein sonaana que casihuruhane

saijjeein, nii baiha nelararajiaain sonaana que acaauru que nejeratenacaauru amuritoorelu. <sup>35</sup> Tabaauru enecuru rai jetao techu, acaauru araachuru onacaauru ichatecurelu.

Jana tabaaurute cairichanojineein neeuruhane caje nichotena coacuelanaala oorelu, ooruhane nihanatiin Cana Coanera aina raotojoei ichaonaa que ichaaorurichaaine esenetaauruhane jaun. <sup>36</sup> Jana tabaaurute acaauru nocoeje chanuhin bisinojineein, *cadena* que ichoanojineein caresero cuhane tenojineein, naaonjoaurelu. <sup>37</sup> Jana tabaaurute, ajeri que bodoosiin, sera que cataaun terunojineein, sabere que sonojineein, naaonjoaain oorelu. Chaen techu, cajihanein amuhemujueein cairicheinejueein, carenero, cabra, naaonjoainuri ujui que cajionecoojueein, cairichanojineein nererojoecaaeriin, naaonjoaain neurelu. <sup>38</sup> Nii cachaaurute chauratane que, nelatihei rijjijeein, cunaja coitucuelanaala cajihanein, cacha areroo cuhin, ichatane ucuunno cuhin, ajeri jioararo jachu cuhane neein, atane jachu ucuacaain nena cuhaneuru cuhin amuhemujueein nerejetocurelu.

<sup>39</sup> Nete nitohanein esenetaain neeuruhane coreniha cacha caohacha rijjijeein coaranaaca Cana Coanera natiin, chuni rai naitoonjoan niicha teeni tenelu, <sup>40</sup> cana coacuhin cana rai jataain caohachanein niicha tei esenetaeranein neinichaachene aina cuaain, acaauru netonai cana aina jiniiquiin esinae rauhijiriin caohacha icharanein ranojineein neeuruhane coina.

## 12

*Jesoso coarajeein nenea rijijeein, itolere bana queecha coaacuche.*

<sup>1</sup> Nitohaneein inae cana que Cana Coaunera esenetaauruhane coarateein coitucuherateeuruhalu nii cachaaurune jaun, jeriha Cana Coaunerane rijijeein ichaonaa jerichaachene nihanatiin itolere bana osaacha ichana coacuhin nihacachene coina cana acateraneein nenea jianein, canaacha esenetai jerenohi ichajeein laraajiin ichaohacachenete caohachae. <sup>2</sup> Aihane jaun, nii esenetaacachene jaan tera neein aca cana suujua rucuherraneein niha Jesusone jaun, queecha coaaucaachenete ne. Inae nii baiha raotojoein rachoojoein Cana Coaunera rori- *trono* raotono nichajai que nelauriaain nerichainne coitucuhane jaunte, rai nocoeje chanuhin coroso que tein atinaauruhane jana, coejenelu.

<sup>3</sup> Nitohanihane jaun, itolere bana Jesoso cairichaaeriin neeuruhalu osaaonacaauru cachaaurune que, inara suujua cuhane coaacuche. Aihane jaun, chatohanei coaraain neeichene nihanatiin, jiaonriha coiinteein esenetaaichene jianequichene. <sup>4</sup> Niheichu nii osa que nesarucuhichene coataa necairichanaa coraquichene jaun coreniha oriheeichein. <sup>5</sup> Nete inae inara, rai calaohi suujuatiha casetecaane rijijeein, inara suujuatiha inara casetecaa Cana Coaunerane jaan baitequiche. Rai Quiricha cuhanete:  
 “Jiaonriha  
 ii suujuatiha, ii casetecaa

Cana Curuaanaa que jaolecoina cacaalabi.

Niheichu

baaso ichaaine coreniha

ii casetecaane,

nainiheei

esenetaaine jianeeine.

<sup>6</sup> Niicha belaaite suujuate

Cana Curuaanaa.

Jerichanejeein techu,

rai calaohi rijijieein

niicha rai casetecaain ne,”

naain ne Cana Coaunera Quiricha cuhane.

<sup>7</sup> Nitohanihane jaun, inara casetecaane abaantaain neeichenete, rai calaohi belaihanerijijieein inara belaiheein Cana Coaunera. Niheichuni canaanai- inacaacha suujuateinelanaala nei.

<sup>8</sup> Jana rai calaohi rijijieein nenacaauru casetecaa suujuatihane rijijieein inara suujuatiha, inara casetecaeniha Cana Coauneranete, rai calaohi esinenelanaala, rai nere tonorae neeichene jaun aicheein.

<sup>9</sup> Chaen techu, caa chauratane que nenacaauru- cana fojiaraauru- cana casetecaain cana suujuateeuruhane, tonoraain nerejetocaaachelu, tonaain erenaa coacuelanaala.

Nitohanihane jaun, cha caaunna nii amuritoheriin dedeeu nenea Cana Inaca Cana Coaunera cana suujuatiha, cana casetecaane abaantaain nenerihacache, chabana satonohelanaala nenea ichaonaa raacachene coina.

<sup>10</sup> Cana fojiaraaurute, jaiti caa chauratane que ichaohacachene jana, nechuraujiaain acaauru jerecuruhane rijijieein nihacachene coina, cana suujuateeuru. Nete Cana Coaunera laen, Nesineneein caohacha icharaneein nihane

jaun cana rai caohacha ichaa cana suujuatiha cana casetecae. <sup>11</sup> Coatih niqúi raotohi caseteco coaracaane, rijieeoritiin cunaain tacaane jaun. Nete nitohanein cana teein cana relaera tonoraain ichaohacane, rauhijiriin raotojoei ichaonaa que ichaohaca.

*Jataainte elunae cana rai Cana Coauneraacha beratei que jaolecohacane*

<sup>12-13</sup> Aihane jaun, nacoauneein nelararajiaain caohachaaain ichaaoche. Nacooauneein caohachaaain rauhijiriin inara suujua coaraain ichaohin, jerichanejeein nacanacaena coacuelanaala neeichene coina.

<sup>14</sup> Satiin cachaauru aina raotojoein ichaaoche, cojoerihu jeriha Cana Coaunerane rijijieein ichaohichene coina. Jeriha Cana Coaunerane rijijieein ichoaeniha cachane, nihei chuni Cana Curuaanaa coarana nainerinaain. <sup>15</sup> Atiin jiniinquiin, jeriha Cana Coaunerane rijijieein, ita coroatajaneen neeuche. Nabana chuni nitohanein nihane jianihane, cacha atinaa ajaena corainei rijijieein leochaauru ichao aasaecane coataa.

<sup>16</sup> Jiaonrihachu chunocoha inara caje, nejelau ene aina ichaohane. Niheichu rai Cana Coauneraacha tei que jaoleconaa nainihe. Nitohanein ichaane jaunte, nechú lenoneecha coreniha, aca nihana saijieein, raineen nenea telu rai nocoala rai Esao.

<sup>17</sup> Nii jaunte, nii coitucuhichene rijijieein, rai caohachanu tiha rai inacane coina bajaane saijieein tenelu rai inaca. Mainajeein chanaain bajaane saijieeinte, tenelu inae nitohanihane jaun.

<sup>18</sup> Nete laen inara, aihuruhalu Isaraelitacurune rijijieein, chatohanai dadaain coanacai,

usineein iihanei, nocoehena tabai, cujuana tabai aina nocoehena, naaonjoain nenea rohan nii nichuuntaeneeiche. <sup>19</sup> Niheichu toniha jaihane aonaheeiche. Niheichu toniha Cana Coaunerane aonaheeiche. <sup>20</sup> Nii aohanraauru jetaote laen, nii naitoonjoan tonorana nainesihurenihane jaun, abaantasilanaala acaauru rai iriha Cana Coaunerane jianeratecurelu. “Chunocoha, caa nihanune jaan- ichtane ucuunno rohan nichuuntaain, ecu turuhin, jelai shaquuin, naaonjoainte ajeri jaberoco, rejoon, naaonjoain que sohin jaonjoinereein, lenone neein aihane nihanatiin” naain iriha Cana Coaunerane jaun. <sup>21</sup> Nitohaneein jataain coasinacaa, nii acaauruhacha coaraine jaun jetaote: “Jataaine rijijijianeun canu nesoone caaunra” nae jetao Moisesa. <sup>22</sup> Nete laen inara nii amuritoheriin, Cana Coaunera nenaja esine Sion bichatane ucuunno, dedeeu nenea Jerosaleeun nichuuntaaiche. Chaen techu oaraanca neein netaojiaain Cana Coaunera coroaecuruha coina, netaojiaain neeuruha anjeraaurune jana coaraquiche. <sup>23</sup> Chaen techu, ichoaichaniha Cana Coaunera calaohi neein dedeeu cocoirichanojineein nenacaauru rohan turuhin coaraquiche. Nitohaneeinte satiin caohachaaain ichaonacaauru cachaauru, aca jerihane rijijieein teein niicha ranojoihunru rai Joesioneein nenea- Cana Coaunera rene turuhiche. <sup>24</sup> Chaen techu nii ena nenea Cana Coauneraacha teratei teraneein nenea Jesocurisito- rai coichana que cana couluoorane maajein coaraquiche. Nii rai coichanate jauriaanejeein cana cairichaeranu que nihalu

Abeli coichana jana, jataain nii amuritoeriin cana rai nelateineein ne.

<sup>25</sup> Nitohanihane jaun, cana rai ereein niha Cana Coaunerane que jaolecohin, batiin neeichene que necohalajiin neeuche. Coaracuche nachuhinti nii jaiti cau chauratane que ne bana, suujuate-najaane coina Cana Coauneraacha cotihacurilu, caje nichotena nainecururiha. Aihane jaun, nii amuritoheriin nichotena nainerihacacheein dedeeu netiin cana suujuatihane que jaolequiin nihacachene. <sup>26</sup> Nii iriha Cana Coaunerane bana jetaote, nii rai nereecha caun nerurujuaelu canarai chauratane. Nete ena laen: “Nacouneeina chauratane rurujuareeunni le sajeein. Coatiha Chaurataneecha nerurujuarinaain, cana rai dede netonaite nerurujuareein,” nae Cana Coaunera. <sup>27</sup> Niritiin: “Nacoaunein le sajeein” naain aito-hanete, satiin niicha counanojoneein nerurujuanaa nainein nenacaauru itajihane jana, nerurujuanaa nainelanaala nenaacha nedaane coina aitoa Cana Coaunerane coitucuerate cana que. <sup>28</sup> Nii cana rai Cana Coauneraacha tei- rai Cojoanonaate chabana nitajena nainene. Nii coreniha “Narihara Cana Coaunera,” naain jini-iquiin rai cachanein neuruhane coarateein aca jerihane rijijieein coroaeraauru aina coaroaecaachenete ne, <sup>29</sup> itolere baaso itajera- usi rijijieein niha Cana Coaunerane jaun.

## 13

*Naaonjoaain, rai suujua rijijieein nihacach-  
enete jere Cana Coaunera.*



<sup>1</sup> Jiaonriha ita nejeraneein nenea rijijieein, jiniiquiin ita belain neeichene jianein neeichene. <sup>2</sup> Niheichu inara rene turunacaauru belain raaichene jianein nenea nainiheiche. Nitohaneein nenacaaurute, acanihane coitucuelanaala Cana Coaunera letonocuru anjeraaurune maa-jeein raarelu rai loreri asaae.

<sup>3</sup> Aitiin caresero cuhane nenacaauru netonai coaucuche, acaauru aina jiniiquiin caresero cuhane nenea rijijieein. Chaenchu cairichaaerinojoneein nenacaauru netonai coaucuche, inara netonai acaauru rijijieein cairichanojoneein nenea nainequichene jaun.

<sup>4</sup> Nitohanihane jaun, inara quichaauru, enecuru, naaonjoaineeichene nisirihateein neeichene, itaque inara suujua acatein, leecha inara sinijerane lanaala nenea coacuelanaala, inara sinijera ainaacha ichaaoche; satiin baaso ichaain rai sinijerane lanaala nenea aina ichoai casetecarichain Cana Coaunerane jaun.

<sup>5</sup> Jiaonrihachu coriquiicha que coacuhin neeichene. Inara rucuhele inaraacha sirii ainaacha raotojoein ichaaoche: “Chabana nihei inara jianein inara que jaolecohanune” naalu Cana Coaunerane jaun. <sup>6</sup> Niritohalu cana rai Cana Coaunerane jaun chaque tonajelanaala nainichaache:

“Cana Coaunerate canu coroatajaneranein ne.

Nii jaun chaque casinaaun.

Chatonai ichana nainihe i canu que camute cacha,” naain erenaa nainichaache.

<sup>7</sup> Inara suujuatein Cana Coaunera ere que inara relaureralu coacuhin, acaauru ichao que

coacuhin, esenetaain ichaaoruhalone rijijieein ichaaoche.

<sup>8</sup> Jesocurisitote jeelaineein nereein, chabana satonoelanaala. <sup>9</sup> Aihane jaun jiaonriha nejelau cuaain inara relanaajerera nihane, rijitoejeein esenetaain neeichene. Nii amuritoeriinte jataain nelate, jeriha Cana Coaunerane rijijieein cana suujua ilaain ichaohacachene. Coatiha chaque nelatihei, nii niicha quiinelanaala nenea iniho quiniha cachane nihanatiin. Coatiha chabana cana rai chaque nelatejeehai nii.

<sup>10</sup> Canate coroso que ohalu Cana Coaunera Calaohi Curisitone coreniha jianacoon osa caje nihacache. Nii *santuario* tein saseredotecuru ichanaa coatiha inae chaque nelateein nedaai. <sup>11</sup> Jana jauriaanejeein nenaalute, saseredotecuru curuanaacha lenonecuru sohin, *santuario* cuhane rai coichana terejetelu osa anihoeraanu que. Nete laen, nii lenone jaberocooru, acaauru loanari caje naain amaain jelai tein mocorejetocurelu. <sup>12</sup> Nii rijijieein techu Jesoso netonai, naain nese caje amaain jelai tein atinanohinelu; rai coichana que satiin rai cachaneein neinichaachene culuocane coina. <sup>13</sup> Aihane jaun, aina jiniiquiin nese caje amanojoneein cana netonai necarichanaa abaantacachenete ne, aihalune rijijieein. <sup>14</sup> Coatiha caa chauratane que nihei cana rai leeinjiin nese chabana nitajenaacharanejeein nei. Nii jaun, chabana nitajenaacharanejeein nenea ariirijiacachenete ne. <sup>15</sup> Aihane jaun, itolere bana Cana Coaunera coroaecaachenete ne, rai Calaohi Jesocurisito aina cuaain. Nii Cana

Coanera coroaecaachenete belaiha rai canaacha teenineein nereein. Aihana jaun cana ujuaae caje coroaecaachenete ne. <sup>16</sup> Jiaonriha caohacha ichana baiteein, leeochoaauru rai inaraacha sirii teein naaonjoaain neeichene jianequichene. Nitohaneein ichoaite rautaain coarae Cana Coanera.

<sup>17</sup> Inara relaaurera ere tonoraain jerecuruhane rijijieein neeuche. Acaaurute nebetacaelanaala inara beraaihure, Cana Coanera rai jitaain inara aina nichanaa beeuruhane rai neeuruhane jaun. Aihane jaun, acaauru jerecuruhane rijijieein, inaraacha ichai ichaain neeuche; acaauruhacha rautaai ichaelanaala. Jana aineeichene, coatiha inara rai chaque nelateriaain inaraacha ichai.

<sup>18</sup> Atiin canacaanu coreniha Cana Coanera bajaauche. Jataain raotojoiha canacaanu su-ujanena jerichaanu; itolere que caohachaaain ichana jerichaanune jaun. <sup>19</sup> Jataain inara aina nacoauneein nenaajerichaaunne jaunna, inara aina nihanune coina Cana Coanera bajaauche. inararai aitoon.

### *Raotojoein jiniiquiin neeuche.*

<sup>20</sup> Rai coichana aina cuaain chabana satonoelanaala nenaajerichaanu tera- rai cachaneein nichachene beraichaneein nenaajerichaanu o caje Jesoso ichatera Cana Coanera, <sup>21</sup> inara ichao rucuerateine Jesocurisito que, aca jerihane rijijieein cha chaain neeichene coina. Chaen Jesocurisito aina cuaain canacaanu que niicha jerei ichamiin. Itolere bana satonoelanaala, Curisitoneein niha Curisitone coitucuurumiin satiin cachaauru. Bajaanachuhinti aihurene.

<sup>22</sup> Atiin raotojoein caa inara suujua nunaer-aanu que inara rai canuhacha laenai raauchera canejeraauru. <sup>23</sup> Cana nejera Timoteeote, inae caresero caje mitue. Enanocoojoa turuhanena, inae inara coaraa uhanune, canu jiniichaain uha-reeunni.

<sup>24</sup> Satiin inara bichauhenaauru aina, satiin Cana Coaunera cachaneein nenacaauru rai, acaauru coaaucaanne beeuche. Italiau nenacaauru netonoaite inara coaacure.

<sup>25</sup> Jataain jeelai amuritoeriin inara coroatajane-miin Cana Coaunerate, satiin raotojoein neeiche.

**Cana Coaunera Ere**  
**New Testament in Urarina (PE:ura:Urarina)**

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Urarina

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

b7ea44d4-3dbd-507b-9a19-256b56fe9b07